



МОНГОЛ УЛСЫН
ЭРЧИМ ХҮЧНИЙ САЙДЫН
ТУШААЛ

2026 оны 05 сарын 22 өдөр

Дугаар А/116

Улаанбаатар хот

Журам шинэчлэн батлах тухай


Монгол Улсын Засгийн газрын тухай хуулийн 24 дүгээр зүйлийн 2 дахь хэсэг, Сэргээгдэх эрчим хүчний тухай хуулийн 5 дугаар зүйлийн 5.3.8 дахь заалтыг тус тус үндэслэн ТУШААХ нь:

1.Сэргээгдэх эрчим хүчний үүсгүүр барих төсөл шалгаруулалтын журмыг шинэчлэн баталсугай.

2.Журмын хэрэгжилтийг нэгдсэн удирдлагаар хангаж, хэрэгжүүлж ажиллахыг Бодлого, төлөвлөлтийн газар (Г.Энхтүвшин)-т даалгасугай.

3.Журмын хэрэгжилтэд жил бүр хяналт-шинжилгээ, үнэлгээ хийж, үр дүнг танилцуулж ажиллахыг Хяналт-шинжилгээ, үнэлгээ, дотоод аудитын газар (Х.Бекболат)-т үүрэг болгосугай.

4.Энэхүү тушаал батлагдсантай холбогдуулан Эрчим хүчний сайдын 2025 оны "Журам батлах тухай" 217 дугаар тушаалыг хүчингүй болсонд тооцсугай.



Б.НАЙДАЛАА

• 172600000341

Эрчим хүчний сайдын 2016 оны дугаар
сарын 22 -ны өдрийн А/116 дугаар
тушаалын хавсралт



СЭРГЭЭГДЭХ ЭРЧИМ ХҮЧНИЙ ҮҮСГҮҮР БАРИХ ТӨСӨЛ СОНГОН ШАЛГАРУУЛАЛТЫН ЖУРАМ

I ХЭСЭГ.НИЙТЛЭГ ҮНДЭСЛЭЛ

Нэг. Ерөнхий зүйл

1.1. Энэ журмаар сэргээгдэх эрчим хүчний үүсгүүр барих төсөл (цаашид “төсөл” гэх) шалгаруулах үйл ажиллагааг төсөл сонгон шалгаруулах болон аукцион зохион байгуулах төрлөөр явуулахтай холбоотой харилцааг зохицуулна.

1.2. Сэргээгдэх эрчим хүчний үүсгүүр барих төсөл хэрэгжүүлэгч нь Эрчим хүчний тухай, Сэргээгдэх эрчим хүчний тухай хууль тогтоомж болон энэ журмыг дагаж мөрдөнө.

1.3. Энэ журамд дараах нэр томъёог дор дурдсан утгаар ойлгоно.

1.3.1. “Төсөл” гэж нэгдсэн сүлжээнд холбогдон үйлдвэрлэх цахилгаан эрчим хүчийг худалдах зорилгоор нар, салхины үүсгүүр болон батарей хуримтлуур хосолсон системд хөрөнгө оруулах, барих, эрчим хүчийг үйлдвэрлэн, худалдахтай холбогдсон үйл ажиллагааг;

1.3.2. “Төсөл сонгон шалгаруулалт” гэж төслийг барьж байгуулах, цахилгаан эрчим хүч нийлүүлэх гэрээ байгуулах эрхийг техникийн болон санхүүгийн үнэлгээний үндсэн дээр үнийн саналаар өрсөлдүүлэх зарчмаар сонгон шалгаруулахыг;

1.3.3. “Аукцион” гэж төслийг барьж байгуулах, цахилгаан эрчим хүч нийлүүлэх гэрээ байгуулах эрхийг өрсөлдөөнт үнийн саналын үндсэн дээр дуудлага худалдааны зарчмаар сонгон шалгаруулахыг;

1.3.4. “Зохион байгуулагч” гэж төслийн захиалагч буюу эрчим хүчний асуудал эрхэлсэн төрийн захиргааны төв байгууллага, Диспетчерийн үндэсний төв, сэргээгдэх эрчим хүчний чиглэлээр үйл ажиллагаа эрхэлдэг төрийн өмчит хуулийн этгээд болон хороог;

1.3.5. “Хороо” гэж төсөл сонгон шалгаруулалт болон аукционыг явуулах чиг үүрэг бүхий дарга, нарийн бичгийн дарга, гишүүдээс бүрдсэн 9-өөс доошгүй сондгой тооны бүрэлдэхүүнтэй эрчим хүчний асуудал эрхэлсэн төрийн захиргааны төв байгууллагаас байгуулах бүтцийг ойлгох бөгөөд хорооны гуравны нэгээс доошгүй нь хараат бус гишүүн байх ба хараат бус гишүүн нь эрчим хүчний салбарт 5 ба түүнээс дээш жил мэргэжлээрээ ажилласан туршлагатай, худалдан авах ажиллагааны чиглэлээр сургалтад хамрагдсан, төрийн үйлчилгээнээс бусад төрийн албанд ажилдаггүй байна.

1.3.6. “Хүсэлт” гэж аукционд оролцох сонирхолоо илэрхийлэх хүсэл зоригийг;

1.3.7. “Битүүмжилсэн үнийн санал” гэж оролцогчийн төсөл хөгжүүлэхтэй холбоотой зардлыг тусгасан нэгж цахилгаан эрчим хүчний үнэ буюу ам.цент/кВт.цагаар илэрхийлэгдэх үнийн саналыг;

1.3.8. “Аукционы ялагч” гэж энэхүү журамд заасан туршлага, санхүүгийн болон техникийн шаардлагыг хангаж, аукционоор хамгийн бага үнэ санал болгосон оролцогчийг;

1.3.9. “Дээд үнэ” гэж Сэргээгдэх эрчим хүчний тухай хуулийн 11.1.1, 11.1.3-т заасныг;

1.3.10. “Дэнчин” гэж аукционд оролцогч төсөл хэрэгжүүлэх нотолгоо болгон хорооны заасан дансанд тодорхой хугацаагаар байршуулах мөнгөн хөрөнгийг;

1.3.11. “Суурилагдсан хүчин чадал” гэж төслийн нэрлэсэн буюу суурилагдах нийт хүчин чадлыг МВт болон МВт.цаг-аар илэрхийлсэн хэмжээг;

1.4. Төсөл сонгон шалгаруулалт болон аукционаар хэрэгжүүлэх төслийн жагсаалтыг эрчим хүчний асуудал эрхэлсэн төрийн захиргааны төв байгууллага тус бүр батална.

1.5. Төсөл сонгон шалгаруулалтын хорооны хурал нь гишүүдийн 75-аас доошгүй хувь оролцсоноор хүчинтэйд тооцогдож, хуралд оролцсон гишүүдийн дийлэнх олонхийн саналаар асуудлыг шийдвэрлэнэ.

II ХЭСЭГ.ТӨСӨЛ СОНГОН ШАЛГАРУУЛАХ

Хоёр. Төсөл сонгон шалгаруулалтын үе шат

2.1. Төсөл сонгон шалгаруулалт нь төслийг нийтэд зарлах, холбогдох хууль тогтоомжид заасан шаардлагад нийцүүлэн сонгон шалгаруулах болон шалгарсан этгээдтэй гэрээ байгуулах үе шатуудаас бүрдэнэ.

2.2. Оролцогч нь төсөл сонгон шалгаруулалтад оролцох сонирхолоо илэрхийлэх, энэ журамд заасан шаардлага хангасан хуулийн этгээд, хуулийн этгээдийн түншлэл байна.

2.3. Төслийн захиалагч нь төсөл сонгон шалгаруулалтыг зохион байгуулахад дараах эрх, үүрэгтэй оролцоно:

2.3.1. төсөл сонгон шалгаруулалтын жишиг баримт бичгийг батлах;

2.3.2. төсөл хэрэгжүүлэх гэрээний загварыг боловсруулах, батлах;

2.3.3. төсөл сонгон шалгаруулалтад шалгарсан оролцогчтой холбогдох гэрээ байгуулах;

2.3.4. шаардлагатай тохиолдолд төсөл сонгон шалгаруулалтын хорооны санал болгосноор үнэлгээний хугацааг нэг удаа 45 хүртэлх хоногоор сунгах.

2.4. Диспетчерийн үндэсний төв нь төсөл сонгон шалгаруулалтыг зохион байгуулахад дараах эрх, үүрэгтэй оролцоно:

2.4.1. эрчим хүчний системийн судалгааг хийж, тухайн онуудад хэрэгжүүлэх хүчин чадал, байршлыг тодорхойлж, төслийн хэрэгцээ шаардлагын судалгааг төслийн захиалагчид жил бүр хүргүүлэх;

2.4.2. хэрэгцээ шаардлагад заасан төслийн нэгдсэн сүлжээнд үзүүлэх нөлөөлөл, горим тогтворжилтын тооцоо, дүгнэлт бусад шаардлагатай мэдээллээр төслийн захиалагчийг хангах;

2.4.3. шалгарсан төсөл хэрэгжүүлэгчтэй эрчим хүч худалдах, худалдан авах гэрээ байгуулах, гэрээний хэрэгжилтийг хангах.

2.5. Сэргээгдэх эрчим хүчний чиглэлээр үйл ажиллагаа эрхэлдэг төрийн өмчит хуулийн этгээд нь төслийн шалгаруулалтад ашиглах төслийн техник, эдийн засгийн үндэслэл, байгаль орчинд нөлөөлөх байдлын үнэлгээ болон холбогдох бусад баримт бичгийг боловсруулна.

2.6. Хороо нь төсөл сонгон шалгаруулалтыг зохион байгуулахад дараах эрх, үүрэгтэй оролцоно:

- 2.6.1. төсөл сонгон шалгаруулалтын баримт бичгийг боловсруулж, төслийн захиалагчаар батлуулах;
- 2.6.2. төслийг үнэлэх шалгуур үзүүлэлтийг боловсруулах;
- 2.6.3. энэ журмын дагуу төсөл сонгон шалгаруулалтыг зохион байгуулах;
- 2.6.4. төслийг шалгаруулсан тухай зөвлөмжийг гаргаж, төслийн захиалагчид хүргүүлэх;
- 2.6.5. төсөл сонгон шалгаруулалтын хорооны гишүүн нь үүрэгт ажлаа хараат бусаар хэрэгжүүлж, ашиг сонирхлын зөрчилгүй ажиллах;
- 2.6.6. энэ журмын 3.2.3-т заасан төсөл хэрэгжүүлэх баталгааны хэмжээг энэ журамд заасан хязгаарт батгаан тогтоох;
- 2.6.7. хуульд тогтоомжид заасан бусад.

Гурав. Төсөл сонгон шалгаруулалтыг нийтэд зарлах

3.1. Төслийн захиалагч нь төсөл сонгон шалгаруулалтын урилгыг урьдчилсан үнэлгээ эхлэхээс 45-аас доошгүй хоногийн өмнө өөрийн цахим хуудас болон олон улсад өргөн хэрэглэгддэг хэл дээр гардаг хэвлэл, мэдээллийн хэрэгслээр нийтэд зарлана.

3.2. Энэ журмын 3.1-д заасан хугацаанд төслийн захиалагчийн цахим хуудсанд дараах мэдээллийг байршуулах замаар оролцогч нарыг шалгаруулалтад оролцуулах бэлтгэл ажлыг хангана:

- 3.2.1. төслийг үнэлэх шалгуур үзүүлэлт;
- 3.2.2. ирүүлэх маягтын загвар;
- 3.2.3. төсөл хэрэгжүүлэх баталгаа, түүний хэмжээ нь санал болгож байгаа хөрөнгө оруулалтын үнийн дүнгийн 1-5 хүртэл хувьтай тэнцүү байна;
- 3.2.4. энэ журмын 2.5-т заасан баримт бичгийг худалдан авах холбоос.

3.3. Энэ журмын 3.2.4-т заасны дагуу худалдан авах төслийн техник, эдийн засгийн үндэслэлд дараах мэдээллийг зайлшгүй тусгасан байна:

- 3.3.1. сэргээгдэх эрчим хүчний нөөцийн судалгаа;
- 3.3.2. тоног төхөөрөмжийн эзэмшлийн зааг;
- 3.3.3. горим, тогтворжилтын тооцоо;
- 3.3.4. хөрөнгө оруулалт, эдийн засгийн шинжилгээ (WACC, IRR, NPV).

3.4. Энэ журмын 3.3-т заасан баримт бичгийг боловсруулсан зардлыг доор дурдсан аргачлалын дагуу тооцож, баримт бичгийг худалдан авах үнийг тодорхойлно:

$$\text{Зардал} = I + P * q + L + T + G + C$$

- I - суурь төлбөр - тавин мянган нэгж;
- P - суурилагдсан хүчин чадал (Ватт);
- q - итгэлцүүр (нарны цахилгаан станц-3, салхин цахилгаан станц-5);
- L - газрын төлбөр;
- T - Эрчим хүчний зохицуулах хорооноос олгох тусгай зөвшөөрлийн хураамж;
- G - Горим, тогтворжилтын тооцооны төлбөр;
- C - Бусад зардал (зөвлөх үйлчилгээний гэрээнд заасан зардал).

3.5. Төсөл сонгон шалгаруулалтын урилгыг нийтэд зарласнаас хойш төслийн үнэлгээний аргачлал, 3.2-т заасан бичиг баримт болон холбогдох бусад баримт бичигт өөрчлөлт оруулахгүй.

3.6. Төсөл сонгон шалгаруулалтын хороо нь төсөл сонгон шалгаруулалтын үйлчилгээний хөлс, шалгаруулалтад оролцох санал хүлээн авах хаяг, хугацаа зэрэг мэдээллийг зар дээр тодорхой бичнэ.

Дөрөв. Төсөл сонгон шалгаруулалтад оролцох санал хүлээн авах

4.1. Төслийн захиалагч нь төсөл сонгон шалгаруулалтын санал хүлээн авах, төсөл сонгон шалгаруулах цахим платформ бүхий мэдээллийн дэд бүтцийг бий болгож, үйл ажиллагаа явуулах найдвартай орчинг бүрдүүлсэн байна.

4.2. Оролцогч нь энэ журмын 3.1-д заасан хугацаанд урьдчилсан шалгаруулалтад оролцох хүсэлтээ цахимаар хүргүүлэх ба нэг оролцогч нэг төсөлд санал ирүүлнэ.

4.3. Оролцогч нь урьдчилсан шалгаруулалтад оролцох хүсэлтийн хамт хуулийн этгээдийн гэрчилгээний баталгаажуулсан хуулбар, түншлэл бол түншлэлийн оролцогч хуулийн этгээдийн гэрчилгээний баталгаажуулсан хуулбар болон түншлэлийн гэрээ, талуудын сүүлийн 5 жилийн аудитлагдсан санхүүгийн тайлангийн баталгаажуулсан хуулбар, туршлагын талаарх мэдээллийг ирүүлнэ.

Тав. Төсөл сонгон шалгаруулалтыг зохион байгуулах

5.1. Хороо нь төсөл сонгон шалгаруулалтыг зохион байгуулахдаа доорх дарааллаар үнэлгээ хийнэ:

5.1.1. урьдчилсан үнэлгээ;

5.1.2. техникийн үнэлгээ;

5.1.3. санхүүгийн үнэлгээ.

5.2. Урьдчилсан үнэлгээг дараах байдлаар хэрэгжүүлнэ:

5.2.1. хороо нь энэ журмын 4.3-т заасан хүсэлтийг хүлээн авч, сүүлийн 5 жилийн ажлын туршлага, санхүүгийн чадавхийн шалгуур үзүүлэлтийг хангаж буй шаардлага хангасан оролцогчийн жагсаалтыг гаргана;

5.2.2. хороо төслийг шалгуур үзүүлэлтийн дагуу үнэлж, урьдчилсан үнэлгээгээр өндөр оноо авсан эхний 5 хүртэл оролцогчийг эрэмблэн төслийн захиалагчид хүргүүлнэ;

5.2.3. хорооноос ирүүлсэн саналыг үндэслэн төслийн захиалагч холбогдох шийдвэрийг гаргаж, тэнцсэн оролцогчийг дараагийн шатны шалгаруулалтад урина;

5.2.4. энэ журмын 5.2.3-т заасны дагуу шийдвэр гарсанаас хойш ажлын 5 хоногийн дотор шалгарсан оролцогч болон бусад оролцогчид урьдчилсан шалгаруулалтын шийдвэрийг цахимаар мэдэгдэж, тэнцсэн оролцогчийн талаар төслийн захиалагчийн цахим хуудас болон олон улсад өргөн хэрэглэгддэг хэл дээр гардаг хэвлэл, мэдээллийн хэрэгслээр нийтэд мэдээлнэ.

5.3. Техникийн үнэлгээг дараах байдлаар хэрэгжүүлнэ:

5.3.1. хороо нь урьдчилсан үнэлгээний үе шатанд тэнцсэн оролцогчид дараах мэдээлэл бүхий санал ирүүлэх урилгыг цахимаар хүргүүлнэ:

5.3.1.1. төслийн нэр, суурилагдсан хүчин чадал, төсөл хэрэгжүүлэх байршил, техник, технологийн шийдэл, нэгдсэн сүлжээнд нийлүүлэх эрчим хүчний хэмжээ;

5.3.1.2. санхүүгийн болон хүний нөөцийн чадавхийн талаарх мэдээлэл, холбогдох зөвшөөрлүүд (тогтоосон маягтын дагуу);

5.3.1.3. үнийн санал (тогтоосон маягтын дагуу);

5.3.1.4. техникийн болон санхүүгийн санал боловсруулахад шаардлагатай мэдээлэл;

5.3.1.5. техникийн болон санхүүгийн саналыг үнэлэх шалгуур үзүүлэлт;

5.3.1.6. төслийг хэрэгжүүлэхэд шаардлагатай санхүүжилтийн эх үүсвэрийг бүрдүүлэх нарийвчилсан төлөвлөгөө;

5.3.1.7. төсөл сонгон шалгаруулалт хүчингүй болох нөхцөл;

5.3.1.8. төсөл хэрэгжүүлэх гэрээний загвар;

5.3.1.9. эрчим хүч худалдах, худалдан авах гэрээний загвар;

5.3.1.10. санал нээхээс өмнө тодруулга өгөх тухай;

5.3.1.11. төслийн санал хүлээн авах эцсийн хугацаа, хүлээн авах газар.

5.4. Оролцогч нь төслийн техникийн болон санхүүгийн саналыг тус тусад нь боловсруулж, цахимаар, тогтоосон хугацаанд ирүүлнэ.

5.5. Хороо нь төслийн техникийн болон санхүүгийн саналыг хүлээн авснаас хойш 45 хоногийн дотор үнэлнэ.

5.6. Техникийн саналд 70 болон түүнээс дээш хувь авсан оролцогчийн санхүүгийн саналыг нээнэ.

5.7. Санхүүгийн үнэлгээг дараах байдлаар хэрэгжүүлнэ:

5.7.1. төсөл сонгон шалгаруулалтын хороо оролцогчийн санхүүгийн саналыг эрэмбэлж, эх үүсвэрээс 1 кВт.ц цахилгаан эрчим хүчний хамгийн бага тариф (НӨАТ-гүй)-ын санал ирүүлсэн төслийг шалгаруулж, зөвлөмж, тайланг төслийн захиалагчид хүргүүлнэ;

5.7.2. энэ журмын 5.7.1-д заасан тайланд төслийн урьдчилсан шалгаруулалтын үнэлгээний талаар болон техник, санхүүгийн саналыг үнэлсэн тайланг тус тус дэлгэрэнгүй бэлтгэж, тусгана;

5.7.3. энэ журмын 5.7.1-д заасан зөвлөмж ирүүлснээс хойш ажлын 5 хоногийн дотор төслийн захиалагч нь холбогдох шийдвэрийг зөвлөмжид үндэслэн гаргаж, шийдвэрийг техникийн болон санхүүгийн санал ирүүлсэн оролцогчид тус тус мэдэгдэнэ.

Зургаа. Шалгарсан оролцогчтой хэлцэл хийж, гэрээ байгуулах

6.1. Төслийн захиалагч төсөл нь шалгарсан оролцогчтой хэлцэл хийх ажлын хэсгийг байгуулж, энэ журмын 5.7.1-д заасан хамгийн бага тариф санал болгосон оролцогчтой хэлцэл хийж, гэрээ байгуулна.

6.2. Шалгарсан оролцогч нь хэлцлийн явцад ирүүлсэн техникийн болон санхүүгийн саналаа өөрчлөхгүй.

6.3. Энэ журмын 6.1-д заасан оролцогчтой тохиролцоонд хүрээгүй бол уг хэлцлийг цуцалж, дараагийн бага тариф санал болгосон оролцогчийг хэлцэлд урина.

6.4. Энэ журмын 6.2-т заасныг зөрчсөн, 6.1, 6.3-т заасны дагуу тохиролцоонд хүрээгүй оролцогчийн төсөл хэрэгжүүлэх баталгааг буцаан олгохгүй.

6.5. Төсөл сонгон шалгаруулалтад шалгараагүй оролцогчийн төсөл хэрэгжүүлэх баталгааг төсөл хэрэгжүүлэгчтэй гэрээ байгуулснаас хойш ажлын 3 хоногийн дотор буцаан олгоно.

6.6. Төслийн захиалагч нь гэрээ байгуулснаас хойш ажлын 5 хоногийн дотор дараах мэдээллийг цахим хуудсандаа байршуулна:

6.6.1. төсөл сонгон шалгаруулалтын баримт бичиг;

6.6.2. урьдчилсан үнэлгээнд төсөл ирүүлсэн оролцогчийн тоо;

6.6.3. урьдчилсан үнэлгээний шатанд шалгарсан оролцогчийн нэр;

6.6.4. төсөл сонгон шалгаруулалтын шатанд техникийн болон санхүүгийн санал ирүүлсэн оролцогчийн нэр;

6.6.5. санхүүгийн саналыг үнэлсэн оролцогчийн нэр;

6.6.6. төсөл нь шалгарсан оролцогчийн нэр, ирүүлсэн үнийн санал;

6.6.7. хорооны гишүүдийн тухай.

6.7. Төсөл сонгон шалгаруулалт дууссаны дараа ирүүлсэн материалыг төслийн захиалагчийн архивт шилжүүлнэ.

Долоо. Гомдол

7.1. Оролцогч нь урьдчилсан үнэлгээний, эсхүл эцэслэн шалгаруулсан шийдвэрийг эс зөвшөөрвөл энэ журмын 5.2.4, 5.7.3-д заасны дагуу ирүүлсэн мэдэгдлийг хүлээн авснаас хойш 5 хоногийн дотор гомдлоо төслийн захиалагчид гаргана.

7.2. Төслийн захиалагч нь гомдлыг хүлээн авч ажлын 5 хоногт багтаан шалгаруулалтын материалтай танилцаж, дахин үнэлгээ хийх эсэх талаар шийдвэр гарган, энэ талаар цахим хуудсаар дамжуулан оролцогч нарт мэдэгдэнэ.

7.3. Төслийн захиалагч нь дахин үнэлгээ хийхээр шийдвэрлэсэн бол холбогдох материалыг дахин үнэлж, шийдвэрийг энэ журмын 7.2-т заасан мэдэгдэл хүргүүлснээс хойш ажлын 3 хоногт багтаан гаргаж, оролцогч нарт мэдэгдэнэ.

7.4. Энэ журмын 7.2-т заасан шийдвэрийг эс зөвшөөрвөл гомдол гаргасан этгээд нь холбогдох хуулийн дагуу шүүхэд хандана.

III ХЭСЭГ. АУКЦИОН ЗОХИОН БАЙГУУЛАХ

Найм. Аукцион зохион байгуулах үе шат

8.1. Аукционыг дараах гурван үе шаттай зохион байгуулна.

8.1.1. аукционыг нийтэд зарлах, хүсэлт хүлээн авах

8.1.2. аукционы урилгыг нийтлэх, оролцогчдыг бүртгэх

8.1.3. аукцион явуулах.

8.2. Хороо нь аукционы техникийн ерөнхий шаардлага, санхүүгийн болон туршлагын шаардлагыг тодорхойлж, дараах чиг үүргийг хэрэгжүүлнэ:

8.2.1. төсөл тус бүрийн байршилыг урьдчилан тодорхойлох;

8.2.2. үүсгүүрийн техникийн үндсэн үзүүлэлт, суурилагдсан чадал, батарей хуримтлуурын чадал болон багтаамж, сүлжээнд холбогдох цэг, ашиглалтад оруулах хугацаа, жилд худалдан авах цахилгаан эрчим хүчний доод хэмжээг урьдчилан тогтоох;

8.2.3. оролцогчоос тодруулга ирүүлсэн тохиолдолд хариуг аукцион болох өдрөөс ажлын 5-аас доошгүй өдрийн өмнө хүргүүлэх.

8.2.4. оролцогчдод нэгдсэн мэдээлэл өгөх арга хэмжээг аукцион болох өдрөөс өмнө зохион байгуулах.

8.2.5. аукционы ялагчийг нийтэд зарлах, гэрээ байгуулах, холбогдох зөвшөөрөл авахад шаардлагатай дэмжлэг үзүүлэх.

8.3. Аукционыг ашиг сонирхлын зөрчилгүй, ил тод, шударга, өрсөлдөх тэгш боломжтой байх зарчмаар зохион байгуулна.

Ес. Аукционыг нийтэд зарлах, хүсэлт хүлээн авах

9.1. Хороо нь аукцион эхлэхээс 40-өөс доошгүй өдрийн өмнө зохион байгуулагчийн цахим хуудас, эсхүл олон улсын өргөн хэрэглэгддэг хэл дээр гардаг хэвлэл, мэдээллийн хэрэгслээр аукционыг нийтэд зарлаж, хүсэлт хүлээн авах талаар мэдэгдэнэ.

9.2. Зарлал нийтлэгдсэн өдрөөс хойш 14 хоногийн дотор хүсэлтийг хүлээж авах ба сонирхогч этгээдийн хүсэлтийн хамт дараах баримт бичгийг ирүүлнэ:

9.2.1. компанийн үйл ажиллагааны танилцуулга, барих-өмчлөх-ашиглах түүнтэй ижил төстэй төслүүдэд оролцсон болон хэрэгжүүлсэн туршлага, цахилгаан станцын зураг төсөл, барилгын ажил гүйцэтгэж байсан туршлага, төслийг санхүүжүүлэх чадавх зэргийг нотлосон баримт бичиг;

9.2.2. хуулийн этгээдийн бүртгэлийн гэрчилгээ, эцсийн өмчлөгчийн талаарх мэдээлэл;

9.2.3. сүүлийн 2 жилийн аудитлагдсан санхүүгийн тайлан;

9.2.4. компанийн үйл ажиллагааны жилийн эцсийн тайлан болон холбогдох баримт бичиг.

Арав. Аукционы урилгыг нийтлэх, оролцогчдыг бүртгэх

10.1. Хороо ирсэн хүсэлтэд үндэслэн оролцогчийн санхүүгийн болон техникийн чадавх, туршлагыг тодорхойлно.

10.2. Хороо нь аукцион эхлэхээс 21-ээс доошгүй өдрийн өмнө аукционы урилгыг нийтэлж, дараах мэдээллээр хангана. Үүнд:

10.2.1. төслийн байршлын мэдээлэл, сүлжээний холболтын цэг;

10.2.2. нар, салхины цахилгаан станцын чадал, МВт (MWac);

10.2.3. батарей хуримтлуурын системийн ашиглах багтаамж (ашиглаж болох эрчим хүч, МВт.ц);

10.2.4. батарей хуримтлуурын системийн хувиргуурын чадал, (PCS);

10.2.5. жилд худалдан авах цахилгаан эрчим хүчний хэмжээ, сая.кВт.ц;

10.2.6. цахилгаан эрчим хүч худалдах, худалдан авах гэрээний загвар, хэрэгжих хугацаа;

10.2.7. үнийн дээд хязгаар, ам.цент/кВт.ц;

10.2.8. аукционы дэнчинг байршуулах гэрээний загвар;

10.2.9. ашиглалтад оруулах эцсийн хугацаа;

10.2.10. техникийн нөхцөл, техникийн ерөнхий шаардлага;

10.2.11. сэргээгдэх эрчим хүчний үүсгүүрийг нэгдсэн сүлжээнд ажиллах үеийн горимын тооцоо.

10.3. Энэ журмын 10.2-т заасан баримт бичгийг худалдан авах холбоосыг аукционы урилгад тусгана.

10.4. Дараах этгээд аукционд оролцох эрхтэй:

10.4.1. Монгол Улсад бүртгэлтэй хуулийн этгээд дангаар болон түншлэлээр;

10.4.2. гадаад улсад бүртгэлтэй хуулийн этгээд зөвхөн Монгол Улсад бүртгэлтэй хуулийн этгээдтэй түншлэлээр;

10.4.3. хүсэлт ирүүлээгүй этгээд.

10.5. Оролцогч нь дараах ерөнхий шаардлагыг хангасан байна:

10.5.1. төслийг хэрэгжүүлэх санхүүгийн чадавх, ижил төстэй төсөл хэрэгжүүлсэн туршлагатай байх;

10.5.2. дампуурал, татан буулгалт, төлбөрийн чадваргүй болоогүй байх;

10.5.3. түншлэлээр оролцогч гадаадын хуулийн этгээд нь өөрийн бүртгэлтэй улсын хууль тогтоомжийн дагуу татвар, хөрөнгө оруулалт оруулах санхүүгийн чадавхаа нотолсон баримт бичигтэй байх;

10.5.4. авлига, мөнгө угаах, терроризмыг санхүүжүүлэх, хориг арга хэмжээ хэрэгжүүлдэггүй байх;

10.5.5. оролцогч, түншлэлийн гишүүн, тэдгээрийн эцсийн өмчлөгч, толгой компани нь олон улсын санхүүгийн болон хөгжлийн байгууллагын эрх хасах, хориг арга хэмжээний жагсаалтад бүртгэгдээгүй байх.

10.6. Нэг оролцогч нэг дор зарласан хэдэн ч төсөлд хүсэлт ирүүлж болох бөгөөд зөвхөн нэг төсөлд оролцоно. Нэг оролцогчийн аукционд оролцох хугацаа хоорондын зай 6 сараас доошгүй байна.

10.7. Аукционд оролцогчид бүртгүүлэхээр аукцион болох өдрөөс 5-аас доошгүй өдрийн өмнө дараах баримт бичгийг ирүүлнэ. Үүнд:

10.7.1. төлөөлөх бүрэн эрх олгох итгэмжлэл;

10.7.2. горимын тооцоо, техникийн нөхцөлийн шаардлагыг хангасан техникийн санал;

10.7.3. барилга угсралтын ажлын хуваарь;

10.7.4. үл маргах журмаар дэнчин алдах мэдэгдэл (журмын 14.7 дахь заалт);

10.7.5. хэрэв түншлэл бол түншлэлийн гэрээ;

10.7.6. сонирхлоо илэрхийлсэн хүсэлт ирүүлээгүй болон түншлэл өөрчлөгдсөн бол оролцогч 9.2-т заасан бичиг баримт;

10.7.7. санхүүгийн болон туршлагын чадавхын мэдээлэл (тогтоосон маягын дагуу);

10.7.8. техникийн ерөнхий шаардлагын мэдээлэл мэдээлэл (тогтоосон маягтын дагуу);

10.7.9. оролцогч нь энэ аргачлалын 10.5-д заасан ерөнхий шаардлагыг хангасныг илэрхийлсэн мэдэгдэлийг, Монгол Улсад бүртгэлтэй хуулийн этгээдийн хувьд 10.5.1-д заасан шаардлагыг хангаж байгаа талаарх эрх бүхий байгууллагын лавлагааг ирүүлнэ.

10.8. Оролцогч нь дээрх баримт бичгийг Монгол хэл эсхүл Англи хэл дээр хорооны заасан цахим шуудангийн хаягт ирүүлнэ.

10.9. Хороо нь оролцогчийн 10.6-д заасан бүртгэлийн бичиг баримт хүлээн авснаас хойш ажлын 3 өдрийн дотор бүрдлийг хянаж, шаардлага хангасан тохиолдолд оролцогчоор бүртгэнэ.

10.10. Бүртгэл баталгаажсан оролцогчид дэнчинг байршуулах талаар холбогдох мэдээллийг хүргэнэ.

10.11. Оролцогч нь аукционы дэнчинг аукцион болох өдрөөс 1 өдрийн өмнө Диспетчерийн үндэсний төвийн дансанд байршуулна.

10.12. Оролцогч нь техникийн саналыг хорооноос тогтоосон маягтын дагуу бэлтгэж ирүүлнэ.

10.13. Оролцогч нь аукционы үнийг санал болгохдоо хорооноос тогтоосон маягтын дагуу зардлуудыг бүрэн багтааж тооцох үүрэг хүлээх бөгөөд дутуу тооцсон зардлыг өөрөө хариуцна.

10.14. Дуудлага худалдааны явц болон үр дүнгийн талаарх тэмдэглэлд оролцогч гарын үсэг зурна.

10.15. Оролцогч нь хорооноос тодорхойлон заасан төлбөр хүлээн авагчтай дэнчин байршуулах гэрээ байгуулан, гэрээнд буюу энэ журмын 10.11-т заасан дансанд дэнчинг байршуулна.

10.16. Дэнчин байршуулсныг баталгаажуулсанаар аукционд оролцох эрх үүснэ.

Арван нэг. Аукцион явуулах

11.1. Аукционыг танхимаар эсхүл цахимаар зохион байгуулна.

11.2. Оролцогчийг төлөөлж аукционд түүний хууль ёсны төлөөлөгч оролцоно.

11.3. Оролцогч аукционд хуулийн шаардлага хангасан итгэмжлэлийн үндсэн дээр төлөөлөгчөө оролцуулж болно. Оролцогч нь түншлэлийн хэлбэрээр оролцож байгаа тохиолдолд зөвхөн нэг итгэмжлэгдсэн төлөөлөгчийг томилж оролцоно.

11.4. Оролцогч нь битүүмжилсэн үнийн саналыг аукцион эхлэхээс 1 цагийн өмнө тусгайлан бэлтгэсэн хайрцагт байршуулна.

11.5. Хороо нь тогтоосон огноо, цагт оролцогчдоос битүүмжлэн ирүүлсэн үнийн саналын хамгийн доод үнийг харуулж аукционыг нээнэ.

11.6. Аукцион нь үнийг бууруулан дуудах хэлбэрээр явагдана.

11.7. Аукционы үед оролцогчдын нэрийг нууцлан, тусгай дугаар олгоно. Оролцогчид аукционд оноосон тусгай дугаараа ашиглан үнэ хаялцана.

11.8. Оролцогчдод аукционы явцад оролцогчийн өгсөн үнийн санал болон тус саналыг өгсөн хугацаа, тухайн үеийн хамгийн бага үнэ, аукционы нийт болон үлдсэн хугацаа талаарх мэдээлэл ил тод байна.

11.9. Үнэ хаялцах үйл явцыг дараах хэлбэрээр зохион байгуулна:

11.9.1. үнийн санал буурах хамгийн бага хэмжээ 0.05 ам.цент/кВт.ц байна.

11.9.2. оролцогч нь аукцион үргэлжлэх хугацаанд нэгээс дээш санал гаргах эрхтэй. Оролцогчийн гаргах дараагийн санал нь түүний өмнөх саналаас бага байх бөгөөд тухайн үеийн хамгийн бага саналаас доогуур байна.

11.9.3. аукцион үргэлжлэх хугацаа 90 минут хүртэл байна.

11.9.4. хороо нь сүүлийн үнийн саналыг зарласнаас хойш 5 минутын хугацаанд түүнээс бага үнийн санал ирэхийг хүлээнэ. Уг хугацаанд шинэ, түүнээс

бага үнийн санал ирээгүй тохиолдолд сүүлийн үнийг гурван удаа давтан зарлаж, гурваас нэг хүртэл тоолсны дараа хамгийн бага үнийн санал гаргасан оролцогчийг ялагчаар тодруулж, дуудлага худалдааг дуусгавар болсонд тооцно.

11.9.5. битүүмжилсэн үнийн саналын хамгийн доод үнэ тэнцсэн бөгөөд 5 минутын хугацаанд үнийн шинэ санал ороогүй тохиолдолд аукционыг хаагдсанд тооцож, ялагчийг тодруулна. Ижил үнийн санал ирүүлсэн оролцогчдоос 10.6-т заасан бүртгэлийн баримт бичгээ цаг хугацааны хувьд түрүүлж ирүүлсэн оролцогчийг аукционы ялагчаар шалгаруулна.

11.9.6. оролцогч илт алдаатай үнийн санал ирүүлсэн тохиолдолд хороо уг алдааг механик болон бичилтийн эсэхийг оролцогчоос баталгаажуулна. Оролцогч алдааг баталгаажуулсны дараа тухайн үеийн хамгийн бага үнийн саналыг цахим системд/дэлгэцэнд дахин байршуулна.

Арван хоёр. Аукционыг түр зогсоох болон цуцлах

12.1. Техникийн болон сүлжээний саатал үүссэн тохиолдолд аукционыг 60 минут хүртэл хугацаагаар түр зогсооно.

12.2. Энэ журмын 12.1-т заасан нөхцөл байдал арилсан тохиолдолд аукционыг хамгийн сүүлд дуудсан бага үнийн саналаас үргэлжлүүлнэ.

12.3. Дараах тохиолдолд аукционыг цуцална:

12.3.1. аукционд 2-оос цөөн оролцогч санал ирүүлсэн тохиолдолд;

12.3.2. ирүүлсэн бүх санал дээд үнээс өндөр тохиолдолд;

12.3.3. энэ журмын 12.1-т зааснаас дээш хугацаанд саатал үргэлжлэх тохиолдолд.

12.4. Хороо энэ журмын 12.3-т заасан тохиолдолд энэ тухай шийдвэр гаргана. Шийдвэр гарсанаас хойш 30 хоногийн дотор аукционыг дахин зохион байгуулна.

Арван гурав. Аукционы үр дүн

13.1. Аукционы хугацаа дуусахад оролцогчдын ирүүлсэн үнийн саналыг өсөх дарааллаар эрэмбэлэх бөгөөд хамгийн доод үнийн саналаар аукционы ялагчийг тогтооно.

13.2. Хороо нь аукцион хаагдсанаас хойш 60 минутын дотор дараах мэдээллийг өөрийн цахим хуудсанд байршуулна:

13.2.1. төслийн ерөнхий мэдээлэл;

13.2.2. аукционы ялагчийн нэр;

13.2.3. аукционы ялагчийн дуудсан хамгийн доод үнийн санал (ам.цент/кВт.ц).

13.3. Аукцион зохион байгуулагдсан өдрөөс хойш ажлын 1 өдрийн дотор оролцогчдод шалгарсан эсэх талаар мэдэгдэл хүргүүлнэ.

13.4. Эрх бүхий этгээд аукционы ялагчид цахилгаан эрчим хүч худалдах, худалдан авах гэрээ байгуулах эрхийг олгох бөгөөд аукцион зохион байгуулагдсан өдрөөс хойш ажлын 5 хоногийн дотор энэ тухай мэдэгдэл хүргүүлнэ.

13.5. Аукционы ялагчаас шаардлагатай тохиолдолд эх хувь эсхүл нотариатаар баталгаажуулсан хувийг гэрээ байгуулахаас өмнө шаардан авч болно.

Арван дөрөв. Дэнчин

14.1. Аукционд оролцогч нь хорооны заасан дансанд төлбөр хүлээн авагчтай дэнчин байршуулах гэрээ байгуулна.

14.2. Оролцогч аукцион болох өдрөөс 1 хоногийн өмнө дансанд дэнчинг байршуулсан байна.

14.3. Дэнчингийн хэмжээ нь нар, салхины цахилгаан станц болон батерей хуримтлуур 1 МВт тутамд 5000.0 ам.доллар (таван мянган америк доллар) байна.

14.4. Дэнчинг дараах тохиолдолд буцаан олгоно:

14.4.1. оролцогч аукционд шалгараагүй тохиолдолд аукцион зохион байгуулагдсан өдрөөс хойш ажлын 5 өдрийн дотор.

14.4.2. аукцион цуцлагдсан тохиолдолд цуцлах шийдвэр гарснаас хойш ажлын 5 өдрийн дотор.

14.5. Аукционы ялагчтай цахилгаан эрчим хүч худалдах, худалдан авах гэрээ байгуулахдаа дэнчинг гэрээний үүргийн гүйцэтгэлийг хангуулах баталгаанд тооцон шилжүүлнэ.

14.6. Ялагч дараах тохиолдолд дэнчинг алдана:

14.6.1. цахилгаан эрчим хүч худалдах, худалдан авах гэрээ байгуулахаас зайлсхийсэн;

14.6.2. авлига, ашиг сонирхлын зөрчил, тохиролцоо, үгсэн хуйвалдаан болон бусад хууль зөрчсөн үйлдэл гаргасан нь эрх бүхий байгууллагаар тогтоогдсон.

Арван тав. Гомдол

15.1. Аукционд оролцогч нь аукционы ялагч зарлагдсанаас хойш ажлын 3 өдрийн дотор хороонд бичгээр гомдол гаргах эрхтэй. Энэ тохиолдолд дэнчинг буцаан олгох хугацааг гомдол шийдвэрлэгдэх хүртэл хугацаагаар хойшлуулна.

15.2. Хороо нь гомдлыг хүлээн авснаас хойш ажлын 5 өдрийн дотор хянан шийдвэрлэнэ.

15.3. Гомдол хянан шийдвэрлэгдэх хүртэл хорооны шийдвэрээр цахилгаан эрчим хүч худалдах, худалдан авах гэрээ байгуулахыг түр түтгэлзүүлнэ.